

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, broj: 17/00, 1/05, 11/06, 13/11 i 15/17) a u vezi sa članom 5. Zakona o zaštiti i spašavanju ljudi i materijalnih dobara od prirodnih i drugih nesreća u Tuzlanskom kantonu („Službene novine Tuzlanskog kantona“, broj: 10/08 i 8/15), Vlada Tuzlanskog kantona, na sjednici održanoj dana \_\_\_\_\_ d o n o s i

## ODLUKU O DODJELI NOVČANE POMOĆI OPĆINAMA I GRADOVIMA IZ SREDSTAVA POSEBNE NAKNADE ZA ZAŠTITU OD PRIRODNIH I DRUGIH NESREĆA

### I - OSNOVNE ODREDBE

#### Član 1. (Predmet)

Ovom odlukom utvrđuju se namjena, visina, kriteriji i postupak za dodjelu pomoći općinama i gradovima na području Tuzlanskog kantona iz sredstava posebne naknade za zaštitu od prirodnih i drugih nesreća koja pripadaju Tuzlanskom kantonu (u daljem tekstu: Kanton), za aktivnosti iz člana 183. stav (1) tačka 8) i stav (3) Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije Bosne i Hercegovine“, br. 39/03, 22/06 i 43/10) (u daljem tekstu: Zakon o zaštiti i spašavanju), kontrola utroška sredstava i izvještavanje o namjenskom utrošku sredstava.

#### Član 2. (Organi nadležni za potrošnju sredstava)

- (1) Sredstva posebne naknade za zaštitu od prirodnih i drugih nesreća (u daljem tekstu: sredstva posebne naknade) su novčana sredstva koja se prikupljaju u skladu sa članom 180. Zakona o zaštiti i spašavanju i koja se vode na posebnom transakcijskom računu otvorenom kao podračun u okviru jedinstvenog računa Kantona, na budžetskoj poziciji 26010002 – Posebna naknada za zaštitu od prirodnih i drugih nesreća.
- (2) Odluke o korištenju sredstava iz stava (1) donose Kantonalni štab civilne zaštite i Vlada Tuzlanskog kantona (u daljem tekstu: Vlada) na prijedlog Kantonalne uprave civilne zaštite (u daljem tekstu: Kantonalna uprava), u skladu sa godišnjim planom korištenja sredstava posebne naknade.
- (3) Realizaciju potrošnje sredstava iz stava (2) vrše Kantonalna uprava i Ministarstvo finansija Tuzlanskog kantona (u daljem tekstu: Ministarstvo finansija).

### II - NAMJENA I VISINA POMOĆI

#### Član 3. (Namjena sredstava posebne naknade)

- (1) Sredstva posebne naknade koja pripadaju Tuzlanskom kantonu (u daljem tekstu: Kanton) mogu se, prema potrebi, dodjeljivati kao sufinansiranje odnosno podrška općinama i gradovima u ostvarivanju njihovih zadataka zaštite i spašavanja za:
  - a) opremanje općinskih/gradskih struktura civilne zaštite,

- b) pripremanje, obuku i vježbe općinskih/gradskih struktura civilne zaštite,
  - c) pomoć u saniranju posljedica prirodnih i drugih nesreća,
  - d) sufinansiranje projekata preventivnih mjera zaštite i spašavanja, a za koje je glavna sredstva osigurana u budžetu Kantona, općina i gradova,
  - e) udruživanje sredstava posebne naknade sa općinama, kantonima i Federacijom Bosne i Hercegovine (u daljem tekstu: Federacija), u zajedničkim projektima razvoja sistema zaštite i spašavanja.
- (2) Sredstva posebne naknade, utvrđena za namjene iz ovog člana, moraju biti sastavni dio planske projekcije budžeta Kantona, na osnovu kojeg Kantonalna uprava donosi Godišnji plan korištenja sredstava posebne naknade za sredstva koja pripadaju Kantonu, uz pribavljeno mišljenje Kantonalnog štaba civilne zaštite.

#### Član 4. (Visina sredstava)

- (1) Visina sredstava koja će se dodjeljivati općinama i gradovima za namjene iz člana 3. ove Odluke utvrđuje se u Planu korištenja sredstava posebne naknade za zaštitu od prirodnih i drugih nesreća za tekuću godinu, a u skladu sa procentima i iznosima propisanim Odlukom o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine Federacije Bosne i Hercegovine“, broj: 4/12, 80/13 i 20/20 - u daljem tekstu: Odluka o korištenju sredstava posebne naknade).
- (2) Kantonalna uprava učestvuje u sufinansiranju za namjene iz člana 3. stav 1. tačke a), b) c) i e) u sljedećim iznosima:
- maksimalno 80% vrijednosti konkretnog projekta ili aktivnosti za općine i gradove čiji prihodi ostvareni po osnovu posebne naknade za zaštitu od prirodnih i drugih nesreća iznose do 3% od ukupno prikupljenih sredstava posebne naknade koja pripadaju općinama i gradovima na području Kantona u godini koja prethodi godini u kojoj se raspisuje javni poziv za dodjelu sredstava,
  - maksimalno 60% vrijednosti konkretnog projekta ili aktivnosti za općine i gradove čiji prihodi ostvareni po osnovu posebne naknade za zaštitu od prirodnih i drugih nesreća iznose od 3-7% od ukupno prikupljenih sredstava posebne naknade koja pripadaju općinama i gradovima na području Kantona u godini koja prethodi godini u kojoj se raspisuje javni poziv za dodjelu sredstava i
  - maksimalno 50% vrijednosti konkretnog projekta ili aktivnosti za općine i gradove čiji prihodi ostvareni po osnovu posebne naknade za zaštitu od prirodnih i drugih nesreća iznose od 7% i više od ukupno prikupljenih sredstava posebne naknade koja pripadaju općinama i gradovima na području Kantona u godini koja prethodi godini u kojoj se raspisuje javni poziv za dodjelu sredstava.
- (3) Evidenciju o prikupljenim sredstvima posebne naknade koja pripadaju općinama i gradovima vodi Ministarstvo finansija i dostavlja mjesečni i godišnji izvještaj Kantonalnoj upravi.

#### Član 5. (Strukture civilne zaštite)

Strukture civilne zaštite, u smislu odredbi ove Odluke, su gradski/ općinski štab civilne zaštite, operativni centar, službe zaštite i spašavanja, jedinice civilne zaštite i povjerenici civilne zaštite.

Član 6.  
(Opremanje)

Pod opremanjem struktura civilne zaštite podrazumijeva se opremanje neophodnom opremom, koja je posebnim propisima ili projektima od zajedničkog interesa utvrđena kao obaveza ili kao minimum neophodan za izvršavanje zadataka iz njihove nadležnosti.

Član 7.  
(Pripremanje, obuka i vježbe )

Pod pripremanjem, obukom i vježbama struktura civilne zaštite podrazumijevaju se aktivnosti koje su planirane u tekućoj budžetskoj godini, u cilju pripremanja, obuke i vježbi, na način i po programima utvrđenim zakonom i drugim propisima iz ove oblasti.

Član 8.  
(Saniranje posljedica prirodnih i drugih nesreća)

(1) Pomoć općinama i gradovima u saniranju posljedica prirodnih i drugih nesreća, u smislu ove Odluke, podrazumijeva sufinansiranje istih, uz uslov da nisu u cjelosti finansirane po drugim osnovama u Kantonu.

Član 9.  
(Zajednički projekti razvoja sistema zaštite i spašavanja)

- (1) U realizaciji zajedničkih projekata razvoja sistema zaštite i spašavanja, koji su od značaja za više općina i gradova, za Kanton ili za Federaciju, u smislu člana 3. tačke e) ove odluke, mogu se udruživati sredstva posebne naknade koja pripadaju Kantonu, sa općinama/gradovima, drugim kantonima i Federacijom.
- (2) U slučaju iz stava (1) ovog člana neophodno je da su projekti utvrđeni u pogramskim i planskim dokumentima zaštite i spašavanja općina/gradova, Kantona ili Federacije, definisanim Zakonom o zaštiti i spašavanju (program razvoja i godišnji plan realizacije programa).
- (3) O prijedlogu zajedničkih projekata, u smislu ovog člana, koji će se sufinansirati iz sredstava posebne naknade koja pripadaju Kantonu, odlučuje Vlada, na prijedlog Kantonalne uprave, uz prethodno pribavljeno mišljenje Kantonalnog štaba civilne zaštite.

### III OPĆI I POSEBNI KRITERIJI ZA DODJELU POMOĆI

Član 10.  
(Opći kriteriji za dodjelu pomoći)

- (1) Za dodjelu pomoći općinama i gradovima za namjene iz člana 3. , tačke a), b) c) i e) ove odluke, primjenjuju se sljedeći opći kriteriji :
  - a) da je formirana služba civilne zaštite općine i grada, u skladu sa članom 31. Zakona o zaštiti i spašavanju (kao dokaz smatra se: izvod iz Pravilnika o unutrašnjoj organizaciji, odluka o osnivanju službe ili drugi dokaz);
  - b) da je formiran općinski/gradski štab civilne zaštite (kao dokaz smatra se: odluka/rješenje o formiranju štaba);

- c) da je donesena procjena ugroženosti općine/grada od prirodnih i drugih nesreća (kao dokaz smatra se: akt o usvajanju procjene);
  - d) da je donesen plan zaštite i spašavanja od prirodnih i drugih nesreća općine/grada (kao dokaz smatra se: akt o usvajanju važećeg plana);
  - e) da je donesen program razvoja zaštite i spašavanja općine/grada (kao dokaz smatra se: akt o usvajanju važećeg programa);
  - f) da općina/grad ima organizovane strukture civilne zaštite (kao dokaz smatra se: odluka ili drugi akt o organizovanju jedinica, službi i drugih struktura civilne zaštite);
  - g) da se sredstva posebne naknade vode na posebnom namjenskom transakcijskom računu (kao dokaz smatra se ugovor sa bankom, potvrda ili drugi relevantan dokument);
- (2) Za svaki od kriterija iz stava (1) ovog člana, podnosilac prijave za dodjelu pomoći dužan je priložiti odgovarajući dokaz.

#### Član 11.

(Posebni kriteriji za dodjelu pomoći)

Općine i gradovi koji koji ispunjavaju opće kriterije iz člana 10. za dodjelu sredstava za namjene iz člana 3., tačke a), b) c) i e) ove odluke, ove odluke, rangirat će se (po redoslijedu i visini odobrenih sredstava), prema posebnim kriterijima, i to:

1. Utrošena sredstva u budžetu općine/grada za zaštitu i spašavanje u prethodnoj godini (bez sredstava posebne naknade) su:
  - a) veća od 0,5 % budžeta općine/grada ..... 10 bodova
  - b) veća od 0,3 % do 0,5 % budžeta općine/grada ..... 8 bodova
  - c) do 0,3% budžeta općine/grada ..... 4 boda
  - d) nisu planirana sredstva u budžetu općine/grada ..... 0 bodova
2. Vrijednost projekta:
  - a) opremanje struktura:
    - planirana vrijednost projekta do 10.000,00 KM ..... 2 boda
    - planirana vrijednost projekta 10.000,00 – 20.000,00 KM ..... 4 boda
    - planirana vrijednost projekta 20.000,00 – 50.000,00 KM ..... 6 bodova
    - planirana vrijednost projekta preko 50.000,00 KM ..... 10 bodova
  - b) priprema, obuka i vježba:
    - planirana vrijednost projekta do 5.000,00 KM ..... 2 boda
    - planirana vrijednost projekta 5.000,00 – 10.000,00 KM ..... 4 boda
    - planirana vrijednost projekta 10.000,00 – 15.000,00 KM ..... 6 bodova
    - planirana vrijednost projekta preko 15.000,00 KM ..... 10 bodova
  - c) saniranje posljedica prirodne ili druge nesreća na:
    - infrastrukturnim objektima ..... 10 bodova
    - javnim objektima ..... 8 bodova
    - stambenim objektima ..... 6 bodova
    - vodotocima II kategorije ..... 2 bodova
  - d) zajednički projekti razvoja sistema zaštite i spašavanja
    - projekat od značaja za Kanton ..... 10 bodova
    - projekat od značaja za 5 ili više općina/gradova ..... 8 bodova
    - projekat od značaja za manje od 5 općina/gradova ..... 6 bodova

Kao dokaz za zajedničke projekte dostavlja se ugovor sa drugim općinama, gradovima ili Kantonom odnosno Federacijom.

Član 12.  
(Ograničenja za dodjelu pomoći)

- (1) Sredstva se ne mogu dodjeljivati općinama i gradovima:
  - a) koji nisu opravdali namjenski utrošak sredstava dodijeljenih u prethodnim godinama iz sredstava posebne naknade koje pripadaju Kantonu
  - b) kojima su sredstva za isti projekat dodijeljena po prethodnom javnom pozivu.
- (2) Ograničenje iz stava (1) tačka b) se ne odnosi na dodjelu sredstava za pripremanje, obuku i vježbe.

IV – POSTUPAK ZA DODJELU POMOĆI

Član 13.  
(Javni poziv)

- (1) Dodjela sredstava za namjene iz člana 3., tačke a), b) c) i e) ove Odluke vrši se putem javnog poziva koji se objavljuje na web stranici Kantonalne uprave.
- (2) Na javni poziv iz stava (1) mogu se prijaviti općine i gradovi sa područja Kantona.
- (3) Prijavu na javni poziv, u skladu sa ovom odlukom, podnosi općinski načelnik/gradonačelnik, u roku od 30 dana od objave na web stranici Kantonalne uprave.
- (4) Prijava na javni poziv podnosi se na obrascima PN-1 i PN-2 koji čini sastavni dio ove odluke.
- (5) Prijava na javni poziv mora sadržavati podatke u koju svrhu i u kojem iznosu se pomoć traži, detaljno obrazloženje planiranih aktivnosti i uz istu se prilažu propisani dokazi i dokumentacija.
- (6) Općina/grad su dužni u aplicirati za projekte i aktivnosti koji su planirani, pripremljeni i objektivno izvodivi u utvrđenim rokovima iz ove odluke.
- (7) Nepotpune i neblagovremene prijave se neće uzimati u razmatranje.

Član 14.  
(Postupanje po prijavama)

- (1) Prijave i dostavljenu dokumentaciju razmatra Komisija koju rješenjem imenuje direktor Kantonalne uprave (u daljem tekstu: Komisija).
- (2) Komisija iz stava (1) vrši postupak bodovanja urednih prijava na slijedeći način:
  - utvrđuje se ukupan broj bodova svih prijavljenih općina/gradova koji ispunjavaju uslove za dodjelu sredstava,
  - ukupan iznos sredstava za raspodjelu po javnom pozivu se dijeli sa ukupnim brojem bodova iz alineje (1) (dobije se vrijednost jednog boda),
  - broj bodova pojedine općine/grada se množi sa utvrđenom vrijednošću jednog boda.
- (3) Općina/grad može aplicirati za samo jedan projekat.
- (4) Nakon završenog postupka bodovanja Komisija će sastaviti rang listu općina/gradova sa odobrenim projektima/aktivnostima i predloženim pojedinačnim iznosima za svaku općinu/grad.

Član 15.  
(Odluke o dodjeli sredstava)

- (1) Odluke o dodjeli sredstava iz člana 13. donosi Kantonalni štab na prijedlog Kantonalne uprave.

Član 16.  
(Ugovori)

- (1) Kantonalna uprava će, nakon što Kantonalni štab civilne zaštite donese odluke iz člana 15. sa općinama i gradovima kojima se dodjeljuje pomoć zaključiti ugovore u kojima će biti utvrđena sva međusobna prava i obaveze.
- (2) Kantonalna uprava vodi evidenciju o dodijeljenoj pomoći u skladu sa ovom Odlukom.

V ROKOVI ZA KORIŠTENJE POMOĆI I KONTROLA UTROŠKA DODIJELJENIH SREDSTAVA

Član 17.  
(Izvjestavanje i rokovi za utrošak sredstava)

- (1) Dodijeljena pomoć se može koristiti isključivo za odobrenu namjenu.
- (2) Općine odnosno gradovi, kojima je dodijeljena pomoć u smislu odredaba ove odluke, obavezni su podnijeti detaljan izvještaj i opravdati potrošnju tih sredstava najkasnije u roku od 12 mjeseci od dana uplate sredstava na račun općine/grada. Izvještaj mora biti potpisan od strane rukovodioca službe civilne zaštite i ovjeren od strane općinskog načelnika/gradonačelnika. Uz izvještaj se dostavljaju i odgovarajući dokazi (ugovori, fakture, računi, zapisnici, izvršeni nalozi za plaćanje i sl.)

Član 18.  
(Kontrola utroška sredstava)

- (1) Direktor Kantonalne uprave će formirati komisiju, koja će obići lokalitete na području općina/gradova, čiji su projekti sanacije prihvaćeni za sufinansiranje, izvršiti uvid na licu mjesta i sačiniti zapisnik.
- (2) Kantonalna uprava će nakon isteka rokova za relizaciju odobrenih projekata izvršiti konačnu kontrolu utroška sredstava i realizaciju projekta, izlaskom formirane komisije na lice mjesta, sačinjavanjem zapisnika ili na drugi način dokumentovanjem utvrđenog stanja.
- (3) U slučaju nenamjenskog utroška dodijeljenih sredstava ili u slučaju da općina/grad ne opravda potrošnju dodijeljene pomoći, Kantonalna uprava je dužna podnijeti zahtjev za raskid ugovora i zatražiti povrat dodijeljenih sredstava.

VI DODJELA SREDSTAVA ZA SUFINANSIRANJE PROJEKATA PREVENTIVNIH MJERA ZAŠTITE I SPAŠAVANJA

Član 19.  
(Uslovi za dodjelu sredstava)

- (1) Sredstva posebne naknade mogu se, u izuzetnim slučajevima, dodjeljivati kao pomoć općinama i gradovima Tuzlanskog Kantona za sufinansiranje projekata preventivnih mjera zaštite kojima se može utjecati na sprečavanje nastanka određenih pojava i opasnosti koje mogu izazvati prirodnu ili drugu nesreću i čijim štetnim djelovanjem mogu biti ugroženi životi i zdravlje ljudi i materijalnih dobara (u daljem tekstu : prevencija).
- (2) Uslovi za dodjelu sredstava posebne naknade za namjene iz stava (1) su:
  - a) da je glavina sredstava osigurana u Budžetu Kantona i budžetu općine/grada,
  - b) da su preventivne mjere prethodno utvrđene u programu razvoja, planu zaštite i spašavanja općine/grada i Kantona i
  - c) da su sredstva za sufinansiranje preventivnih mjera planirana u godišnjem planu korištenja sredstava posebne naknade.

#### Član 20.

(Kriteriji za dodjelu sredstava za sufinansiranje projekata preventivnih mjera)

- (1) Za dodjelu sredstava općinama i gradovima za sufinansiranje projekata preventivnih mjera zaštite i spašavanja, pored općih kriterija iz člana 10. ove Odluke primjenjuju se i sljedeći posebni kriteriji:
  - ugroženost/vjerovatnoća pojave i dešavanja prirodne nesreće na lokalnoj zajednici utvrđena u planskim dokumentima
  - učestalost i intenzitet pojave uzroka prirodne nesreće prema podacima dostavljenim u dnevnim, mjesečnim i godišnjim izvještajima
  - površina teritorija lokalne zajednice obuhvaćena stanjem prirodne nesreće, broj ugroženih stambenih, privrednih i pomoćnih objekata,
  - broj ugroženih objekata infrastrukture od značaja za lokalnu zajednicu,
  - da na ugroženom području nema bespravno izgrađenih objekata koji onemogućavaju implementaciju projekta prevencije.

#### Član 21.

(Način raspodjele sredstava)

- (1) Novčana sredstva za sufinansiranje prevencije dodjeljuju se na osnovu javnog poziva koji objavljuje Kantonalna uprava.
- (2) Postupak po javnom pozivu provodi na način propisan u članu 13. i 14. ove Odluke uz primjenu kriterija iz člana 10. i 20.

#### Član 22.

(Odluke i ugovori)

- (1) Odluke o dodjeli sredstava za sufinansiranje prevencije donosi Vlada, na prijedlog Kantonalne uprave, uz prethodno pribavljeno mišljenje Kantonalnog štaba civilne zaštite.
- (2) Kantonalna uprava će, nakon što Vlada donese odluke iz člana 15. sa općinama i gradovima kojima se dodjeljuje pomoć zaključiti ugovore u kojima će biti utvrđena sva međusobna prava i obaveze.

Član 23.  
(Zajedničke odredbe)

Odredbe ove odluke koje se odnose na obrasce za prijavu na javni poziv, izvještavanje, rokove utroška sredstava i kontrolu utroška sredstava na odgovarajući način se primjenjuju i na dodjelu sredstava za prevenciju, ako ovom odlukom nije drugačije propisano.

VI- PRELAZNE I ZAVRŠNE ODREDBE

Član 24.  
(Prestanak važenja propisa)

Danom stupanja na snagu ove odluke prestaje da važi Odluka o dodjeli pomoći općinama iz sredstava posebne naknade za zaštitu od prirodnih i drugih nesreća („Službene novine Tuzlanskog kantona“, broj: 15/14, 16/17 i 2/21).

Član 25.  
(Stupanje na snagu)

Ova odluka stupa na snagu danom donošenja objaviće se u „Službenim novinama Tuzlanskog kantona“.

B o s n a i H e r c e g o v i n a  
Federacija Bosne i Hercegovine  
T U Z L A N S K I K A N T O N  
V L A D A

PREMIJER KANTONA